

## Imbabura - Huañu Dios Escribichishca - Free from Death Scriptures

- Romanos 6:23 Juchata rurashpa causajcunamanga, huañushpa chingagrinatami cujun. Ashtahuangarin ñucanchi Apunchi Cristo Jesusmandami, causaita causagrinata Taita Diosca yanga caramujun.
- Romanos 8:2 Cristo Jesushuan shujlla tucushcamanda, causaita causagrinata caraj Diospaj Espiritumi, juchata rurashcamanda huañushpa chingagrichun ñucata mandajumandaca cacharichihuarca.
- 2 Timoteo 1:10 Shina cashpami juyajushcataca cunambica, ñucanchita Quishpichij Jesucristo shamujpi ricuchimurca. Paimi, ali villaita villajushcamandaca, huañuita tucuchirca. Shinallata tucuritapash, na tucurina causaigutapashmi, michaman llujchimurca.
- Job 5:2 Shinlli shungu runataca, ninanda fiñarinaca huañuchinshnami charin. Imatapash ninandapacha munaj runataca, imapash ñucapajlla cashcaman yajuna yuyaimi tucuchin.
- Oseas 13:14 Paicunataca, Seolman rinamandapash quishpichishami, huañunamandapash llujchishami. Huañui, ñucami canda huañuchij casha. Seol, ñucami canda tucuchij casha. Ñuca ñavimandaca, llaquinapash pacajungami.
- Salmos 9:13 Mandaj Dioslla, ñucataca llaquihuayari. Ñucata na ricunayachijcuna llaquichijpi llaquita apajujtaca ricuhuayari. Huañuica ña pungupishna cajpipash, canmi jatarichihuanguí.
- Job 6:26 ¿Imata ruraitapash na ushahpa rimashca, huairashna chingaj shimicunatachu jarcashpa rimangapaj yarinajunguichi?
- Job 33:22 Paipaj almaca, pambana utujuman rinallami tucun. Paipaj causaica, huañuchij runacunapajman chayanallami tucun.
- Ezequiel 37:12,13 Shina cashcamanda paicunaman, cashna nishpa villai: Mandaj Jatun Diosca, cashnami nin: 'Ñuca agllashcacunalla. Ricuichi, ñucami cangunata pambashca utujucunata pascasha. Chai pambashca utujucunamanda llujchishpami, Israel llactaman pushamusha. 13 Ñuca agllashca gentecunalla. Cangunata pambashca utujucunata pascashpa, chai utujucunamanda cangunata llujchijpimi ñucataca, Mandaj Dios cajta yachanguichi.
- Mateo 27:52 Huañushcacunata pambashca utujucunapash pascarijpimi, Diospajlla causashpa huañushcacunaca, ashtacacuna causarirca.
- Génesis 2:7 Shinamandami Mandaj Taita Diosca, runataca ñutu alpamanda rurarca. Chai runapaj singapi fucushpami, causaita cuj samaita curca. Chaimandapachami runaca, causaita callarirca.
- Génesis 6:17 Ricui, ñucami ninambacha tamiata, cai pachaman cachamugrini. Causaita cuj espirituta charij, cai pachapi tucui causajcunata tucuchingapajmi,

chashna cachamugrini. Cai pachapi ima tiashcapash, tucuillami huañunga.

Génesis 7:15 Chaicunaca, huambuna jatun huasimanmi Noé runahuan shamunajurca. Causaita tucui charijcunaca, causaita kuj espirituta tucui charijcunami, ishcai ishcai shamunajurca.

Génesis 7:22 Cai pachapica, causaita kuj espirituta singahuan aisashpa tucui causajcunapash, ima tiashcacunapash tucuillami huañurca.

Job 12:10 Causaita tucui charijcunapaj almaca, paipaj maquipimi. Tucui gentecunapaj samaipash, paipaj maquipimi.

Job 33:4 Ñucataca, Diospaj Espiritumi rurahuarca. Tucui Ushaita Charij Diospaj samaita fucushpami, causaita cuhuarca.

Hechos 17:25 Pai imata minishtijupishna paita alicachishpa gentecuna imata maquihuan rurachumbash, na munanllu. Paica causaita, samaita, imata munashcatapash tucuicunamanmi caramujun.

Apocalipsis 13:15 Shinallata chai manllanayai animalman rijchajta rurashca causaita charichunga, jipa animal samaita carachumbashmi, Diosca saquirca. Shina carajpimi, chai animalman rijchajca rimai ushahpa, paita na alicachijcunataca, tucuillata huañuchinajuchun mandajurca.

Juan 10:10 Shuhuaca apangapaj, huañuchingapaj, tucuchingapajllami shamun. Ñucaca, causaita causagrinata juyailagutapacha charichunmi shamurcani.

Isaías 28:15 Paillata chashna llaquichisha nishpa llaquichishcamandaca, ¿imatata nina cani? Ñuca alma chashna jatun llaquihuan cashcamandaca, ñuca causajui tucui huatacunapi, na jariyashpa purijunatallami charini.

Isaías 28:18 Seolman ña rishcacunaca, candaca na ashtahuan jatumbi churai ushangachu. Huañushcacunapash, candaca na ashtahuan alicachi ushangachu. Pambana utujuman huañushpa rijcunapash, can na llullashpa pactachinacunataca na shuyangachu.

Isaías 5:24 Shinamandami paicunaca, nina rupashpa ujshata tucuchijpishna, jupata ninapi rupachijpishna tucurinajunga. Sapi ismushca yurashnami canga. Juyaila sisacunashna cashpapash, ñutu alpata huaira apashcashnami canga. Paicunallatami, tucuita Mandaj Dios mandashcata fiñashpa, israelcunapaj jucha illaj Diospaj Shimitaca, millanayachishpa saquinajurca.

Joel 1:12 Uvas chagracunapash chaquishcami. Jigos yuracunapash tucurishcami. Granadilla yuracuna, palmera yuracuna, manzana yuracunapashmi chaquishca. Alpapi tiaj tucui yuracunapash chaquishcami. Shinami, huañuna aichayu runacuna cushijunaca tucurishca.

Oseas 13:15 Huauqui purapi, Efrainbaj aillu ninanda mirajujpipash, Mandaj Dios cachamushca rupajlla huairami tucuchij shamunga. Jichushca pambamanda rupajlla huaira shamushpami, paicunapaj llujshijuj yacutaca chaquichinga. Paicunapaj pugyumanda yacupashmi tucuringa. Shinallata paicuna imata charishca munanayai juyailacunatapash, paimi quichushpa apanga.

Apocalipsis 22:1 Chai jipami, causaita kuj na mapayashca jatun yacutapash ricuchihuarca. Chai yacuca, Taita Diospash, Llamapash mandashpa

tianajumandami, espejoshna punchapamba llujshijurca.

Juan 4:10 Shinamandami Jesusca, cashna nishpa tigrachirca: —Taita Dios quiquinman imaguta carasha nijutapash, na yachanguichu. ‘Yacuguta carahuai’ nishpa maijan mañajutapash, na rijsinguichu. Ñucata rijsishpaca, quiquinmi yacuguta mañahuanguiman. Quiquin mañajpica, causaita caraj yacugutami caraiman— nircami.

Juan 4:14 Ashtahuarin ñuca carasha nijuni chai yacuguta maijambash ufiashpaca, cutinga na yacunayachingachu. Ñuca carashca yacuguca, paipaj shungupica causaita carangapaj llujshijuj pugyu yacugushnami canga— nijurcami.

Proverbios 13:14 Runaca, paipaj shimi rimashcamandallatami, imata cashpapash na munangacaman japinga. Paipaj maquihuan imata rurashcashnallatami, pai japinata cunga.

Proverbios 14:27 Mandaj Diosta manllanaca, causaita kuj yacu llujshijunshnami. Shina manllanaca, huañuchij lazucunamanda caruyachingapajmi ali.

Ezequiel 13:17-23 “Huañuna aichayu runa. Cambaj llacta huarmicunata ricushpa, paicuna ima tucunatapash villai. Chai huarmicunaca, paicunapaj shungu yarishcatallami villanajun. 18 Paicunataca cashna ningui: Mandaj Jatun Diosca, cashnami nin: ‘Yumbucuna maquipi huatarina cintacunata sirajcunapash, yumbucunapaj umapi quilparina uchilla telata, jatun telata ruraj huarmicunapash ¡aij, imachari tucunguichi! Cangunapaj causaipi imatapash charingapajllami, chaicunata jatushpa ñuca agllashcacunapaj almataca, umachishpa pandachinajunguichi. 19 Cangunaca, maqui junda cebadamanda, asha faqui tandamandallami, ñuca agllashca puracunapica, napash huañuchina runacunatara huañuchishpa, huañuna runacunataca na huañuchishpa saquinguichi. Shinami llullashcatara uyanajuj, ñuca agllashcacunataca llullarcanguichi. Chashnami, ñucataca yangapi churarcanguichi. 20 Chaimandami Mandaj Jatun Dios ñucaca, cashna nini: Ricuichi, yumbucuna maquipi huatarichun canguna rurashca cintacunataca tucuchishami. Chaicunahuanmi, almacunatapash ñapash pandachinguichi. Paicunataca, cangunapaj maquimanda cacharichishami. Calpanajujta japinshna canguna pandachishca almacunataca, alasyu animalcuna calpanshna purinajuchunmi cacharisha. 21 Shinallata yumbucunapaj umapi quilparichun canguna rurashca telacunatapashmi liquisha. Ñuca agllashcacunataca, cangunapaj maquimanda cacharichishami. Paicunaca, na ashtahuan cangunapaj maquipi japi tucungachu. Chaita ricushpami ñucaca, Mandaj Dios cajta yachanguichi. 22 Cangunaca, chashna llullashpami, imatapash cashcatapacha rurajtaca llaquichinguichi. Paitaca, ñucaca na llaquichircanichu. Shinallata cangunaca, ñucata na manllajcunamanrami, paicuna nalita ruranajushcata ama saquichun, nali yuyaita cushpa cushichishpa shinlichircanguichi. 23 Shinamandami, muscuipishna yangallacunata ricunatapash, na ashtahuan ricunguichi. Yachaniami nishpa

llullashpa villanatapashmi saquinguichi. Ñuca agllashcacunataca, cangunapaj maquimanda cacharichishami. Shina rurajpimi ñucataca, Mandaj Dios cajta yachanguichi' nishpa villai" nihuarcami.

Jeremías 21:8 Caipi gentecunataca, cashna ningui: Mandaj Diosca, cashnami nin: "Ricuichi, cangunapaj ñaupajpica causana ñanda, na cashpaca huañuna ñandami churani.

Job 34:22 Jatun nalita rurajcuna pacajungapaca, yana yana tutapash, huañui japinalla llandupash, na tianllu.

Salmos 16:10 Ñuca almataca, na Seolpi saquihuanguichu. Cambajlla cashcamandaca, ñuca cuerpo ismuchumbash na saquihuanguichu.

Salmos 23:4 Can ñucahuan cajpimi, huañui japinalla llandu pugru pambata rijushpapash, ima nalitapash na manllasha. Cambaj varami, cambaj tauna caspimi, ñucataca shinllichishpa charihuanga.

Salmos 30:3 Mandaj Dioslla, ñuca almataca Seolmandami vichai llujchihuarcangui. Pambana utujuman ama richunmi, causaita cuhuarcangui.

Salmos 49:15 Ashtahuangarin ñuca causaitaca, Taita Diosmi Seolpaj ushaimandaca quishpichihuanga. Paimi ñucataca pushahuanga. Selah

Salmos 56:13 Canmi ñuca almataca, huañunamanda cacharichircangui. Can Taita Diospaj ñaupajpi purichunmi, urmagrijupipash charihuarcangui. Michapi causajcunahuan causachunmi, chashna rurahuarcangui.

Salmos 68:20 Taita Diosca, ñucanchi Taita Diosmi. Paimi, ñucanchitaca quishpichinga. Mandaj Jatun Diosmi, huañunamandapash cacharichinga.

Salmos 89:48 ¿Maijan runashi, huañuita na ricushpa causajungalla? Seolpaj ushaimandaca, ¿pita cacharichingayari? Selah

Salmos 102:19,20 Mandaj Diosca, jahuapi tiajuj paipajlla huasimandami ricujurca. Jahua pachamandami, cai pachataca ricujurca. 20 Prezu tiajcuna aij nishpa huacanajujta uyangapaj, huañuchi tucunapacha nishcacunata cacharichingapajmi, chashna ricujurca.

Salmos 116:8 Canmi, ñuca almataca huañuimanda cacharichircangui. Ñuca ñavimanda viquitapash, ñuca chaqui lluchanatapashmi charihuarcangui.

Proverbios 10:2 Nalita rurashpa imatalla charishcacunaca, ima alipajpash na cangachu. Ashtahuangarin imatapash cashcatapacha ruranaca, huañuimanda cacharichinmi.

Isaías 26:19 Cambaj huañushcacunaca, cutin causangami. Huañushca cuerpocunaca causaringami. ¡Ñutu alpa ucupi samajcunalla, rijcharishpa candaichiyari! Huañushcacunaca, paramuhuan granocuna viñanshnami, alpamanda llujshinajunga. Cai pachaca, huañushcacunata tigrachimungami.

Juan 5:28,29 Ñuca cashna nijujtaca, na manllarinachu canguichi. Huañushpa pambai tucushcacunaca, tucuillami ñuca rimajujta uyanajunga. Chai punllacunaca, ñami chayamujun. 29 Chai punllapica, imatapash aliguta rurashpa causajcunallami causaita causanajunga. Ashtahuangarin imatapash nalitalla rurashpa causashcacunaca, ninanda llaquichi tucungapajmi

causaringa.

Juan 10:28 Paicunamanmi, causaita causagrinataca carani. Chaimandami, chingaita chingangapaca na rinajuga. Paicunataca, ñucapaj maquimandaca pipash na quichushpa apangachu.

Juan 11:43,44 Shina nishpallami: —¡Lázaro, chaimanda llujshimui!— nishpa caparirca. 44 Shina caparijhuami, huañushca Lázaro runaguca maquindi, chaquindi pillushca, umatapash telahuan pillushca llujshimurca. Shina llujshimujpimi, Jesusca: —Pillushcacunata pascashpa, richun saquipaichi— nirca.

Juan 12:17 Lázaro runagu huañushpa pambai tucushcataca, Jesusmi cayachishpa causachirca. Chaitaca, Jesusta catishpa rijcuna ricushca cashpami, shujcunamambash villachinajurca.

Juan 17:2 Tucuicunata mandachunmi, quiquimbaj ushaitaca ñucaman carahuarcangui. Shinallatami quiquin ñucaman carashca tucuilla gentecunamambash, causaita causagrinata carani.

1 Corintios 15:19-26 Cai pachapi causaipajlla Cristota crinimi nishpa shuyanajushpaca, tucui gentecunatapash yali ashtahuan llaquinayaimi canchiman. 20 Ashtahuangarin cunanga Cristoca, huañushcacunapaj chaupimandami causarirca. Paica punda causarishpami, paita crij huañushcacuna causarinata ricuchijun. 21 Cai pachapica, shujlla runamandami huañunaca callarirca. Shinallata shujlla runamandami, huañushcacunapaj chaupimanda causarinapash callarirca. 22 Imashnami Adán runapaj miraicunaca, tucuicuna huañunajun. Chashnallatami Cristohuan causajcunaca, tucuicuna causachi tucunga. 23 Tucuicunami, paicuna causarinapillata causaringa. Tucuipaj pundaca, Cristomi causarirca. Chai jipami, Cristo tigramujpica, paipajlla tucushcacuna causaringa. 24 Ashtahuan chai jipamanmi, tucurimui canga. Paita na ricunayachij tucui mandajcunatapash, tucuilla mandajcunatapash Cristo tucuchishpami, pai mandajushcataca Taita Diosman cutin tigrachinga. 25 Ashtahuangarin Cristota na ricunayachijcunataca tucuicunata, paipaj chaqui sarunapi Dios churana punllacaman Cristo mandajunami ashtahuan ali. 26 Tucuripi tucuchi tucuna fiñajca, huañuimi.

2 Corintios 1:9,10 Huañuchi tucunapacha cashcatami, ñucanchillata yacharcanchi. Na ñucanchillata ushaita charishpa, ashtahuangarin huañushcacunata causachij Taita Diosta yariashpa causangapajmi, chashna tucurcanchi. 10 Llaquinayaita huañunamandaca Diosmi quishpichirca, cunambipash quishpichijunmi. Paillatami jipamambash quishpichinga.

2 Corintios 3:6 Diosllatami, shuj mushujta ari nishcata villachunga, ñucanchiman curca. Chai mushujca, escribishca tiajujtaca na nijunllu. Ashtahuangarin Diospaj Espiritumandami yachachijun. Escribishca letracunaca huañuchijunmi, ashtahuangarin Diospaj Espirituca causachijmi.

Colosenses 1:21,22 Cangunapaj yuyaipi imatapash nalita yarishpa, nalita rurashpami, pundacunaca Diosta na rijsishpa, fiñashpa chingashca

causarcanguichi. Ashtahuangarin cunanga, Dioshuan cutin ali tucuchunmi, 22 Cristoca aichayu tucushpa, ninan llaquita apashpa huañurca. Paipajlla causashpa, na mapayashcata, na juchachi tucushcata, Diospaj ñaupajpi cangunata ricuchingapajmi, chashna huañurca.

Hebreos 2:9 Ashtahuangarin Jesustaca, ashmandalla na angelcunata shna rurashcatami ricunchi. Ninan llaquita apashpa huañujpimi, Jesustaca juyaila coronata churachinshna ninanda alicachirca. Taita Diospaj ninan juyaimandami, tucucunamanda huañunata munachun, chashna rurarca.

Hebreos 2:14,15 Chai huahuacunaca aichatapash, yahuartapash charinmi. Shinallatami Jesuspash aichayu, yahuaryu tucurca. Huañuita mandana ushaita charij diablota, Jesús huañushpa tucuchingapajmi, chashna tucurca. 15 Shinallata huañunata manllashpa, tucui causaipi huatai tucushcashna causajcunata cacharingapajmi, chashna tucurca.

Hebreos 11:5 Enoc shuti runagutapash, crishcamandallami ama huañuchun causajtallata aparca. Taita Dios apajpimi, paitaca mascashpapash na tarirca. Enoc shuti runaguca, nara apai tucushpallatami, Taita Diosta cushichishpa causajujtaca ricuchijurca.

1 Pedro 3:18 Cristoca, ñucanchipaj juchacunamandami shuj viajella huañurca. Ñucanchi imatapash cashcatapacha na ruraj cajpipash, paica imatapash cashcatapacha ruraj cashpami, ñucanchita Taita Diospajman pushangapaj huañurca. Paica, aichapi huañushcapacha cashpapash, Diospaj Espiritupica causachi tucurcami.

2 Pedro 1:3 Causaipaj tucui ima ali canatapash, llaquishpa causanatapash, ninan ushaita charij Diosmi ñucanchiman caramurca. Chaitaca, pai punchapambagu cashpa, alicachi tucushca cashpa, ñucanchita cayajpi paita rijshcamandami, shina caramurca.

1 Juan 3:14 Ñucanchica, huañushcashna causanata saquishpami, causaita causagrinaman yalishcanchi. Chaitaca, crij puracuna juyarishpa causashpami yachanchi. Crijcunata maijambash na juyashpaca, huañushcashnami causajun.

1 Juan 5:11 Taita Diosca, cashna nishpami villajun: Causaita causanataca, Taita Diosmi ñucanchiman caramushca. Chai causaitaca, paipaj Churimandallami caramushca.

Apocalipsis 21:6 Cashnatapashmi nihuarca: “Cashna nishcataca, ña pactachircanimi. Ñucami, A letrashna tucuita callarichijpash, Zeta letrashna tucuchimujpash cani. Maijambash yacunayachijpica, ñucami causaita cuj pugyumanda yacuguta, yanga carasha.